



Thanda woke umuntu

IsiNdebele

Pitsi Ragoasha



Thanda woke umuntu

Itlolwe ngu Pitsi Ragoasha
Umtjengisi Heidel Dedekind



Itjhugululwe ngu Mncedi Ntuli

UNakedi bekunguye kwaphela
umntwana wakaKamela noMeladi.



Ababelethi bakaNakedi bebanjingile
banemali enengi begodu bebakghona yoke
into abekayifunako.

Uyise lakaNakedi bekayindoda elungileko
ethanda abantu begodu angadeleli.

Okutjhayisanako, unina lakaNakedi
bekathanda ukulwa ayihlanganisa, adelela
begodu anganabo nobuntu.

UNakedi bekadelela njengonina yingakho
bekaseduze kukanina kunoyise.

Abantwana abanengi bebazikhambela ngeenyawo ukuya esikolweni.



UNakedi bekasiya esikolweni ngetsikiri etja ehle. Ngaso soke isikhathi begade aqhotjhela abanye abentwana ngetsikiri yakhe namkha ngomaliledinini wakhe obiza imali enengi.

Lokha nakasekhaya nofana asesikolweni bekahlala njalo alandelwa siqhema sabentwana. Bebakarwa maqhinga awenza ngetsikiri yakhe nofana umaliledinini omuhle.

Nanyana kunjalo begade angekho noyedwa ovunyelwa bonyana athinde izinto zakhe.

Woke amalanga uNakedi bekeza namathoyisi amatjha esikolweni eza nawo ukuzokukghantjhela abanye.



Bekathaba nakalela abanye abentwana lokha nebabawa ukusebenzisa amathoyisi wakhe.

Ngesinye isikhathi begade abatjela emehlweni bonyana angeze abanikela amathoyisi wakhe ngombana bona abanalitho nabo abangamnikela lona.

Unina begade amtjela kobana angabelani ngamathoyisi wakhe ngombana bazawonakalisa.

Unina wamtjela bonyana akakathengeli boke abentwana beVezubuhle amathoyisi.

Esikhathini esinengi unina lakaNakedi uya ekhabo labesana abanye ayobakhalimela ngokuthinta ngekani amathoyisi wakaNakedi.

Sengitjho nabotitjhere besikolweni sakaNakedi
bebamazi unina kobana umumuntu onjani.

Bebasesaba nokumkhalima lokha nakenza
izinto ezimbi ngombana bebasazi bonyana
uzokutjela unina.

Nange utitjhere angamkhalima, uzokufika
ekhaya atjele unina kobana utitjhere
uyamzonda.

Unina lakaNakedi akangabazi ukuya esikolweni
afike alwisane notitjhere okhalimele uNakedi
nanobe uyise lakaNakedi angamkhuthazi
ukwenza lokho.





Kesinye isikhathi uNakedi watjela unina kobana akasafuni ukufundiswa nguKkz.Sekepe ngombana uyamzonda.

Unina lakaNakedi wavakatjhela uKkz.Sekepe esikolweni wamthukela ngaphambi kwetlasi yakhe.

Wamtjela bonyana umonakalela uNakedi ngombana unomaliledinini omuhle, begodu bewamtjela nokobana alise ukuhlukumeza amalungelo wakhe.

UKkz.Sekepe wayokubika isenzo lesi kuphrisipala begodu wabizela unina lakaNakedi nge-ofisini lakhe wamkhalima.

Ngelinye ilanga uNakedi abuyela ekhaya abuya esikolweni wabona inyoka ehle encani iseqadi kwendlela wayidobha ngesandla sakhe.



Bekangakalemuki kobana ingamluma begodu
nokobana nayo inetjhefu njengenyoka edala.
Inyoka yamluma esandleni wabese uyiphosela
phasi.

UMokete banoMapudi bebamlandela bathola
ahlengezelisa isandla sakhe asebulungwini
obukhulu.

UMapudi ngokurhabako wabopha ibhande
lakhe ngehla kwalapho alunywe khona
wavimba itjhefu ingasabalaleli kiwo woke
umzimba.

Lokha nebambona aragela phambili
nokuba buthakathaka balinga ukumenzela
ummoya ngokusebenzisa iincwadi zabo
begodu namataka wemithi bawasebenzisa
njengefeni yommoya.



Masinyana ngemuva kwalokho watsirimezeka,
bathatha isiqunto sokubiza i-ambulesi.

UMapudi walinga ukusebenzisa umaliledinini
wakhe kodwana azange kwenzeke ngombana
bekanganayo i-ethayimu alinga nokusebenzisa
umaliledinini wakaNakedi kodwana bekacimile.

Akekho noyedwa obekakwazi ukumkhanyisa
ngombana uNakedi bekangavumeli nanyana
ngubani athinde umaliledinini wakhe.

Boke abentwana abakhamba endleni
leyo nebaya esikolweni babuthana
endaweni yesehlakalo.



Abanye abentwana bebakikiteka begodu
bangazwelani naye be bathi naye ubegade
angekhe abasize nange abathola nabo
basebujameni obunjengalobu.

UMapudi bekangasi njengalaba abanye yena
bekamzwela ubuhlungu waphuthuma esitolo
esiseduzana wayokubawa irhelebho.

Ngetjhu du elihle umnini sitolo wakwazi
ukubethela i-ambulesi umtato.

I-ambulesi yafika ngokurhaba okukhulu,
waphuthunyiswa esibhedlela seDennilton.

UNakedi waqeda iveke yokuthoma esibhedlela
asegumbini labagula khulu.

Ngemuva kobana uNakedi aphumile egumbini
labagula khulu wacithi godu iimveke ezintathu
alulamela esibhedlela.

Uyise wamtjela bonyana kwenzeke ini nokuthi
abalingani bakhe bamsize bunjani.

Wathukwa nakabona kobana upheze wafa
begodu usizwe ngibo bona laba abentwana
yena ahlala ngaso soke angabaphathi kuhle
begodu abathuke nokubathuka.





Abalingani bakhe bangetlasini bathumela
ithimba labafundi abalitjumi bangetlasini
lakhe kobana liyomvusela esibhedlela.

Begade baphethe amathuthumbo nekarada
elimlulamisako limfisela ukululama masinya.

Babawa notitjhere wabo uKkz.Sekepe kobana
abaphekelele ukuya esibhedlela.

UNakedi ngokumangala athabile ukubona
abalingani bakhe bamvakatjhele njengomba
bekangakabalindeli nakancani.

Bekaphethwe ziinhloni khulu akazange
akwazi nokukhuluma nabo wahlalela ukulila
nje kwaphela.

Ivakatjho labafundu begodu noKkz.Sekepe
ukuzomsekela kwamzwise ubuhlungu
obukhulu kwamphathisa neenhloni.

UKkz.Sekepe wamcolisa begodu wamtjela
nangokuthi alibale ngezehlakalo ezidlulileko.

Wamtjela bonyana bona bamthabele
ngombana ubuphilo bakhe sele busukile
engozini.

Nokuthi bangakuthabela ukumbona
atjhugulukile eendleleni zakhe afunde
ukuphila kuhle nabanye abantu.





Abafundi bebasese ngewodini lokha unina lakaNakedi nakafikako naye azomvakatjhela. Akazange akholwe amehlo wakhe lokha nekababonako walahla nokukhukhumala kwakhe waphahluka ngesililo.

Kwathatha uKkz.Sekepe isikhathi sokobana amthulise. Lokha unina lakaNakedi nasele athulile angasaliliko, wathokoza uKkz.Sekepe begodu nabafundi ngevatjho labo.

Wathi ivakatjho labo libafundise okukhulu. Ekugcineni wabawa uKkz.Sekepe kobana amlibalele ngokumthuka ngaphamilini lokha nakamzela esikolweni.

Lokha uNakedi asele aphilile, wadedelwa
esibhedlela wabuyela ekhaya.

Ngelanga abuyela ngalo ekhaya, abalingani
bakhe besikolweni beza bazomamukela ekhaya.

Wahlambalazeka godu, begodu akazange
akwazi ukubaqala.

Akazange akwazi ukulinda ilanga lapho
ayokubuyela khona esikolweni ayokubawa
abotitjhere nabafundi kobana bamlibalele.

Ngalobo ubusuku waba nebhudango lapha
azibona khona asesikolweni ezithabisa nabanye
abentwana.





Ngelanga elilandelako uNakedi wavuka
ekuseni khulu wakhamba waya esikolweni.

Lokha nekafika esikolweni wabawa
uphrinsipala kobana abize abafundi boke
ababizele endaweni abahlanganela kuyo.

Wabawa woke umuntu kobana amlibalele
ngezinto ezimbi azenzako nofana
azitjhwileko kibo.

Uphrinsipala wamthokoza bewamhalalisela
uNakedi ngokuvula ikhasi elitjha begodu
nangokuzisola kwakhe.



Ababelethi bakhe nabo beza esikolweni
bazokuthokoza abafundi ngokusindisa ubuphilo
bakaNakedi nekasendleleni ebuyela ekhaya.

Unina lakaNakedi wathi ufuna ukunikela
abesana labo imali engange kulungwana
eyodwa yamaranda njengokutjengisa
ukuthokoza.

Nanyana kunjalo abesana azange bayivume
imali leyo bathi bona bebasiza nje uNakeni
bebangakalindeli umtlomelo.

Bebabuye bathokoza uNakedi banonina
ngokuvula ikhasi elitjha.

AMAGAMA WOKUTHOKOZA

Itlolwe ngu

Pitsi Ragoasha

Umtjengisi

Heidel Dedekind

Umhleli 1

Pandelani Claudine Rambau

Umhleli 2

Isabel Seakamela

Umhleli 3

Irene Masemola

Umtlami

PixelPing Design

Umtjhugululi

Mncedi Ntuli

Umqinisekisi

Johannah Phephelaphi Mnguni



ISBN 978-0-638-00772-5



basic education
Department:
Basic Education
REPUBLIC OF SOUTH AFRICA

